

OPĆE PRAVO NA KRETANJE U PRIRODI U ŠVEDSKOJ

U Švedskoj svi imaju pravo boraviti u prirodi, pa i na zemljištu u privatnom vlasništvu. Ovo pravo nazivamo općim pravom na kretanje u prirodi. Riječ je o slobodi koja znači i veliku odgovornost, koja se sažeto može opisati riječima Ne smije se ometati - ne smije se uništavati. Ovdje dolje možete pročitati ukratko o općem pravu na kretanje u prirodi. Detaljnu informaciju o ovom švedskom pravu naći ćete na švedskom, engleskom i njemačkom jeziku na Internet-strani Državnog zavoda za očuvanje prirode www.naturvardsverket.se. Na istoj strani nalazi se i sažet tekst o općem pravu na kretanje u prirodi na lakom švedskom jeziku. Postoje i brošure na švedskom, engleskom i njemačkom jeziku, koje sadrže sažetu informaciju o općem pravu na kretanje u prirodi.

Hodati, voziti bicikl i jahati

Dozvoljeno je hodati, voziti bicikl i jahati u prirodi. Ali, okućnica, zasadi i obrađena zemlja zabranjena su područja. Okućnica je zemljište uz porodičnu kuću gdje oni koji stanuju u kući imaju pravo živjeti na miru. Ako prolazite preko pašnjaka, morate zatvoriti kapiju iza sebe. Izbjegavajte voziti bicikl i jahati preko mekanih staza i drugog osjetljivog tla! Nemojte jahati rekreacionim ili skijaškim stazama!

Motorna vozila i privatni putevi

Zabranjeno je voziti automobil, motocikl, moped i druga motorna vozila preko terena gdje je zemljište nezaštićeno. Teren je sva zemlja u prirodi, uključujući puteljke, rekreacione staze i staze za pješačenje. (Dozvoljeno je voziti motorne sanke samo ako ne postoji rizik da se nanese šteta šumama ili tlu pod snijegom. U nekim područjima potpuno je zabranjeno voziti motorne sanke, ili je to dozvoljeno ali samo na posebnim stazama). Ponekad može biti zabranjeno voziti motorna vozila preko privatnih puteva. Takvi putevi označeni su znakovima zabrane. Inače, dozvoljeno je pješačiti i voziti bicikl na privatnim putevima.



Šator i kamp-kućica

Dozvoljeno je podići šator dan ili dva u prirodi. Da biste mogli kampirati pod šatorom duže vrijeme ili u blizini kuće, morate zatražiti dopuštenje od vlasnika zemljišta. Zatražite dopuštenje i prije nego što postavite kamp-prikolicu ili auto-kamper pored privatnog puta. Nije dozvoljeno voziti kamp-prikolicu ili auto-kamper preko terena, na primjer preko obala ili livada.

Na vodi

Dozvoljeno je voziti se brodom ili čamcem, privezati brod ili čamac na kraće vrijeme, izaći na kopno i kupati se kraj obala, osim u blizini kuća za stanovanje. Imajte na umu da postoje područja za zaštitu ptica i druga područja, gdje je zabranjeno boraviti na vodi ili izlaziti na kopno. Ta područja su označena znakovima.



Ribolov

Dozvoljeno je slobodno pecati/bez plaćanja taksi, štapom za pecanje sa ili bez mašnice, kao i nekim drugim ručnim priborom, kraj morskih obala i na pet najvećih jezera u Švedskoj. Da biste mogli pecati u drugim vodama, morate imati dozvolu za sportski ribolov ili drugu potrebnu dozvolu. Slobodnim ribolovom nije obuhvaćen ribolov mrežom, pecanje kroz rupu u ledu, pecanje iz plovećeg motornog čamca ili čamca na vesla. Slobodnim pecanjem nije obuhvaćeno ni pecanje lososa kraj obala u Norrlandu.

Pas i lov

Ostavite gnijezda, legla i prebivališta životinja kao i njihovu mladunčad na miru. Zabranjeno je ozlijediti ili uznemiravati divlje životinje. Psi se ne smiju puštati da slobodno trče u prirodi u vrijeme od 1. marta do 20. avgusta kada su životinje zajedno sa svojom mladunčadi. I u drugim periodima pas se mora držati na oku kada je u prirodi. U mnogim područjima za organizirane boravke u prirodi i na otocima u arhipelagu uobičajeno je da je pas vezan na uzicu.

Vatra

U toku ljeta često vlada zabrana paljenja vatre. Tada je sva otvorena vatra zabranjena, čime su obuhvaćena i posebna mjesta pripremljena za loženje vatre. U drugim slučajevima dozvoljeno je ložiti vatru uz najveću moguću opreznost. Ugasite vatru brižljivo! Nemojte nikada ložiti vatru direktno na golom kamenu – kamen tada može pući!

Bobice, gljive i cvijeće

Dozvoljeno je brati divlje bobice, gljive i cvijeće koje nije pod zaštitom zakona. Ali zabranjeno je bez dozvole sjeći drveće i grmlje, kršiti grane ili grančice, lomiti koru breza ili na neki drugi način nanositi štetu drveću koje raste.

Počistite za sobom!

Zabranjeno je bacati ili ostavljati smeće u prirodi. Razbijeno staklo, limenke, plastika, strune za pecanje i drugo smeće umanjice i pokvariće doživljaje prirode. Smeće može isto tako ozlijediti ljude i životinje.

Zakonom zaštićena priroda

U prirodi koja je pod zaštitom zakona, kao što su nacionalni parkovi i prirodni rezervati, važe posebna pravila koja mogu ograničiti opće pravo na kretanje u prirodi. U područjima za organizirane boravke u prirodi mogu postojati posebna lokalna pravila. Ovo je simbol zakonom zaštićene prirode.



Detaljnija informacija

Ako želite detaljniju informaciju o važećim pravilima, možete se u prvom redu obratiti općini u kojoj stanujete.